

KERWEREDD 1977

Isch gries eich all ehr Leid vunn Nerrermohr,
wie er do sitze, ob met lange orrer met kerze Hoor.

Es iss schunn wärrer e ganes Johr vorbei,
mancher iss jezdt schunn Oba unn hat sei Enkelscher debei.

Mer griese a die do unne in kerze orrer lange Hosse,
ob se sauwer sinn orrer met Sommersprosse.

Willkomm all, ob Dicker orrer Dinner,
ob Kerzer, Langer orrer Spinner.

Net zu vegesse, die Warme unn die Kalde,
obs Junge sinn orrer Allde.

Ehr hann eich allega do ruffgeschafft,
de äh met veel unn de anner met wennischer Kraft.

Em Petrus hammer ferss gude Wedder e Kärtsche geschickt,
unn dodruff wärd a jetzt schä änner geschlickt.

Mer hoffe, die Red dud kenner eire,
sunschd vegeht uns die Luschd am feire.

Wann isch eich sieh do unne sitze,
unn isch dohowwe uff de Läder muss schwitze,

Will isch eisch saan, so kanns net bleiwe,
isch muss mer amol de Schwäs abreiwe.

Drumm hammer bei de Musikande das Liedsche bestellt:
“Oh, wie schön iss doch diese Welt!”

Ess gebt werrer e neii Schdorry vunn unserem Rennfahrer,
er hod de Fiererschein - zack, weg warer.

Met seim Audosche war er in de Geschend erum getuckert
unn had debei ganz schä gekluckert.

Ess had net lang gedauert,
do hansem de häm vor de Hausdeer uffgelauert.

Es Briefsche woldenserm kassiere,
dass wollder net gleisch kapiere.

Er hod die Herrschafde no erm Veschdand gefroohd
unn had ne a glei die Schlä ogedrohd.

Dodruffhie hadder werrer umgesaddelt
unn is mem Mofa dursch die Schlachlöcher gepaddelt.

Dodeledschd hats dann geb denne große Knall
unn es issem die Schdroß ins Gesischd gefall.

De Wäg war bis vor die Hausdeer verschmeert,
dodruffhi harrer es Gesischd nei dapezeert.

Im Krangehaus woldense noch behalle,
doch er had ne net gedu denne Gefalle.

Jetzt drauder sisch nimmi aus seim Zimmersche raus,
mer kanns jo veschdeh, er sieht e bisje vegrummbelt aus.

Doch der dud sisch nix dodraus mache,
in e paar Daach durer a do driwwer wärrer lache.

Ehr Musikande speele demm Mann voller Schdolz:

“Am Felsefesd säder werrer Holz!”

Straußbuwe !!!!

Wem iss die Kerb ?

Unser Kerb soll lewe !!!!

Unn noch emol !!!!

Mer hann do imm Ord noch e paar Baure,
isch glaab, die misse sisch jetzt all die Schdalldere zumaure.

Ess iss noch gar net so lang her,
do hats geschdirmt unn geränt ganz schwer.

Aa hats ganz bees gewittert,
dass die Maure hann gezittert.

Awwer de Karl, der had sisch gefrät,
weil er hodjo sei Rindscher hinnerm Haus uff de Wäd.

Er had sisch dann inns Bettsche geschmess,
do sinn nem die Hosse negschd veress.

Mojens, do hadder die Rindscher gezelt,
oh Schreck - do had doch gladd ens gefelt.

Er had sisch uff die Such gemacht,
de Reschd harrer gefunn drunne ann de Bach.

Do harrer gleisch e Suchtrupp alamiert,
doch die Gangschder ware ganz schä raffiniert.

Sie hann nor noch e paar Schbure gefunn,
die Helft vunn demm Bullsche bleibt bis heit noch veschwunn.

Doch Karl, loss der das enne rode,
wad ned, bisse der de negschde brode.

Die Musik speelt dem Karl net wenisch:
“Uff meiner Rensch, do bin isch de Kenisch!”

Straußbuwe!!!!

Vorhin iss do unne enner derbber iwwer de Platz gerennt,
mer had grad gemennt - demm had ebbes gebrennt.

Sunndachs mojens kummt er derbber uff die Fels getrollt
unn frot glei, ob de Rubel rollt.

Dann zieht er derbber fünf Kimmerling ab
unn schnell gehts iwwenaus im Trabtrab.

Er schpringd derbber zumm Schrotthännler owwenaus
unn saad, kumm zieh mer emol de Bulldogg eraus.

Deledschd wolld er derbber was bringe
unn had vesucht, metnem Baam se ringe.

Er had derbber vesucht, das Ding se wenne,
doch der scheint sei Vehikel schlecht se kenne.

Das Gefährt had derbber e Schlenger geschlaa,
do war demm Ringer sei Brill nimmi da.

Do had ne de Bulldogg so komisch gekribbelt,
do hadener derbber vunn sich geschittelt.

Drummm loss das enne saa - mer soll net alles derbber, derbber mache,
do bassere a net so Sache.

Ehr Musigande speele jetzt derbber:
“Gebe dem Mann schnell was se trinke, sunschd vederder!”

Straußbuwe !!!!

Wemm iss die Kerb ?

Unser Kerb soll lewe !!!!

Unn noch emol !!!!

Durch Nerremohr kann mer ball nur noch laafe,
orrer mer kann sich gleisch e Geländeaudio kaafe.

Denn beim Kanalbau hannse sämtliche Stroße uffegerobbt,
awwer känni mä gescheit zugeschdoppt.

Awwer dass häd unns alles net so gekränk,et,
doch dann hannse a noch die Brück geschprengt.

Wann jetzt jemand do iwwe annehinkt,
muss er uffbasse, dass er net im Schlamm vesinkt.

Dann hannse do iwwe a de halwe Hang abgebuddelt,
de Werner had beim Kaffeedrinke gans schä geschnuddelt.

Jetzt muss er die Garasch a noch abschditze,
sunscht dut se em de Hang nunner ritsche.

Dohinne beim Reis, wo mer zum Ottsche nuff tappt,
do hats met de Rohr iwwerhapt net geklappt.

Do hanse wie die Schildbürger gedenkt,
hinneno had sich die Schroß negschd um drei Meter gesenkt.

De Reis Oddo had sich vor Angschd ball in die Hosse gemacht,
die Arweider hann sich do driwwer nur velacht.

Mer wolle hoffe, dass se die Großbaustelle bald schließe,
sunschd misse mer noch e paar Johr die Bach ins Puhlloch gieße.

Ehr Musigande haue jetzt in die Taschde,
bei dem Kanalbau misse mer ball ofange se fashde.

Straußbuwe !!!!

Inn Nerrermoor do werd gebaut,
die ganze Ägger unn Wisse sinn schunn vesaut.

Doch ehr Leid, isch muß jetzt ganz laut lache,
do basere bei uns oft die dollschde Sache.

Driwwe am Hang iss e Häusje ennschdann,
jetzt fahre dert die Toorischde endlang.

De Bauherr had die beschde Arschidekte angeschiert,
die hann dann gemolt unn a werrer radiert.

Doch demm Mäxje had nix gefalle,
er wollt halt e Häusje, wo aus de Roll dud falle.

Die Blaner wuschde gar kee Rot,
do hanse met em geschproch - der war awwer schunn längschd dot.

Der hatse dann uff de Gedanke gebrung,
jetzt werd de Blan vun de Leischehall genumm.

Es had a gar net so lang gedauert,
do hanse schunn ann de Krufte gemauert.

De Fahrschduhl hadder sisch midde inns Häusje baue losse,
do werre die Gäscht automatisch inn de Himmel geschosse.

Wann isch sold mol sanft entschlafe,
dun isch beim Mäxje im Keller rumlaafe.

Die Musik spelt jetzt met veel Gewischi:
“Hoffendlich bleibt de Keller a dischd!”

Straußbuwe !!!!

Inn Nerrermoor, do gebs noch e paar Persone,
ferr die däd sisch e Abmacherungskur a werklisch lone.

Enni had sisch kerzehand dozu entschloss
unn had sisch jetzt die Röckscher enger mache geloss.

Sie iss seid neischdem in Landschduhl im Sanatorium
unn blagt sisch met ere Punde dorumm.

Aus lauder Vezweiflung iwwer die schleschd Behandlung
had se schunn finf Pund abgenumm.

Owens do leidse im Beddsche rumm
und drämt vunnem Schnitzel mit allem drummerum.

Sowas kann jo nimmand lang aushalle,
desshalb dudse owens iwwers Budsche herfalle.

Därt am Schdändsche dud se dann kräfdisch unnerleje,
e halb Schdunn späder kann se sisch ball nimmi beweje.

Am annere Daach geht die Faschderei vunn vorne werrer oo,
wanns so weidermacht, iss ball nix mä anner droo.

Hob, ehr Musigande speele jetzt inn froher Runde:
“Ach je - wo sinn dann blos mei Punde?!”

Straußbuwe !!!!

Wem iss die Kerb ?

Unser Kerb soll lewe !!!!

Unn noch emol !!!!

Neierdings hammer imm Derf zwae Rogger,
bei denne sitzt de Kolt gans schee logger.

Met de Mofas dunse rattere
unn in ganz Deitschland die Wertschafte abklappere.

Denn das Saufe, dass kenne die zwee ganz gud,
kä Wunner, zu sorer Maschin gehert jo a Mud.

De Lui, der fahrt wie e Gehenkter,
De Heini hat schunn Routine, denkter.

Biss jetzt hanse es noch immer geschafft
unn um die griene Meis e Bo gemacht.

Dann fräe se sisch wie die klenne Kinder,
denn sie sinn doch alle zwee Promillesinder.

Mer gewwe eisch unser Sesche,
wann er eisch dun in die Kurve leje.

Vunn uns aus do kenner a rase,
solang ner bei uns do howe net die Luft vegase.

Die Musik speelt denne zwee jetzt voll Rasse:
“So ein Mofa iss doch wirklich Klasse!”

Straußbuwe !!!!

Wem iss die Kerb ?

Unser Kerb soll lewe !!!!

Unn noch emol !!!!

Ehr kennene all, er iss iwverall bekannt,
geschder had er noch gelä unn hat alles gestreckt inn de Sand.

Do unne in Bulgarie had er mett de Weibslaid rummgescherzt,
inn de Zwischezeit iss emm dehäm es Häusje ball inngesterzt.

Ess Julsche had fluchtardisch ess Häusje veloss
unn isch binn mett de Omma hinnehergeschoss.

Jetzt muss er sich awwer schnell was iwverleeje,
sunschd dud negschd Woch die ald Bud werklisch nimmi steje.

Langsam muss isch uffhere, iwwer mei Vadder se plausche,
denn isch her schunn de Toijoda anrausche.

Die Musik speelt denne zwee voll Wonne:
“Wann finne mer endlich es Häusje ann de Sonne?!”

Straußbuwe !!!!

Wemm iss die Kerb?

Unser Kerb soll lewe !!!!

Unn noch emol !!!!

So jetzt gugge misch nochamol o zum Schluß
unn wanner lieb sinn, griener schpäder allegar e Kuß.

Isch dun misch a ver eier Komme bedanke
unn hoffe, dass mer jetzt zusamme enner tanke.

Dodevor had sich de Werd a kräfdisch gerischd,
herrener a, wies Bier drinn zischd.

Do jowwe hannse geschdabelt bis unner die Deck
vumm Oddo die Wershd, vumm Paule die Weck.

Awwer bevor mer jetzt ess Esse uns Dringe genieße,
dumer se ershd noch unseer Schdrauß met Wei begieße.

Strauß mit Wein begießen !!!!

Du sollschd uns es ganze Johr iwwer zuwinge,
dass mer noch oft so sesamme sinn unn enner dringe.

Wanner jetzt denke, ess geht so weiter,
do hanner eisch geschnerrt, isch schdel mich jetzt runner vunn meiner Leider.

Isch san eisch uffwidersehn, serwus und gudbei,
awwer vegessen net, die Kerb iss lang noch net vorbei.

Straußbuwe !!!!

Wem iss die Kerb ?

Unser Kerb soll lewe !!!!

Unn noch emol !!!!